

Edwin Jacobs, director di SVb:

Embehecimento por crea problema pa fondo di pensioen



DEN entrevista cu Edwin Jacobs director di SVb a puntr'e riba e promedio di edad di envehecimento aki na Aruba. Awendia e hendenan ta biba mas largo. Esaki ta bon pero naturalmente e ta trece cierto problemanan tambe pa e fondonan cu mester t'ey pa paga pensioen. Na SVb nan tin diferente tarea y ta monitorea hopi cos cu tin di haber cu promedio di edad. Nan mester tin un indicacion pa tin e fondonan disponibel pa e pensioennan.

Hende muher ta biba mas largo cu hende homber. E promedio di edad di hende homber ta 77.3. Na 2011 e tabata 77.8 y na 2010 e tabata 77.8 aña tambe. Hende muher su edad promedio ta 80.9, na 2011 e tabata 80.5 y 2010 e edad tabata 79.8. Den nos sistema tin hendenan cu tin mas cu 100 aña tambe. E edad di hende grandi ta aumentando y esaki ta un trend mundial tambe. E acceso na cuido medico a trece e desarojo positivo

aki cu ta pone cu e expectativa di bida tambe ta aumenta.

E cifranan total di pensioen ainda SVb no tin nan completo pero den edad di pensioen pa hende homber e tabata core den 76 pa 77 aña cu nan ta bandona e sistema di pensioen debi na fayecimento. Hende muher ta biba mas largo. Cerca hende muher e edad ta core entre 80 cu 81 aña. Ing Edwin Jacobs a splica cu e sistema tecnologico tambe a hunga un rol. SVb su expectativa ta cu e trend lo sigui subi. Naturalmente mester garantiza e sistema financiero pa cumpli cu e pago di pensioen tambe. A largo plazo e pensioen general pa trahado obligatorio mester duna un contribucion na diversificacion di e fuente di entrada pa nos grandinan. Den termino cortico Gobierno tambe a introduci e sistema di flex pensioen. Tin diferente cambio den e sistema di edad di pensioen pa garantiza algo mas cu e entrada basico di pensioen di behez.

Segun Jacobs, ta bon pa sa cu e sistema di pensioen ta basa riba e sistema cu ta haya pensioen a base di e añanan cu un hende ta segura, mayoria bes esaki ta di 15 pa 60 aña di edad. 45 aña sigur bo mester tabata biba na Aruba. Si esey no sosode, bo ta haya un buraco den bo pensioen. Si bo no a biba ful e periodo aki na Aruba, e ora bo ta haya reduccion. Pa pareha casa esaki ta 1.1% y pa e personanan soltero esaki ta 2.2%. Tin hende cu a bin traha na nos isla for di exterior y mirando e edad cu nan a yega Aruba esaki ta pone cu nan no ta cobra e placa di pensioen completo. Pa diferente grupo cu no a haya nan pensioen completo e flexpensioen ta fin net bon. Nos mester ta prepara pa tin bon entrada pa garantiza e pensioen.

E pensioen basico ta algo sigur cu mester tene cuenta cune. Edwin Jacobs director di SVb durante entrevista a splica cu tin hende cu ta busca manera di haci algo

apart pa complimenta nan pensioen y tin un bida normal. Den pensioen na SVb nan tin un buraco di 2.3 miyon florin pa luna mirando cu no ta tur hende ta cobra pensioen completo na edad di 60 aña. Pa luna ta paga riba 15 miyon florin. Mester keda monitorea e situacion pa duna e conseho necesario na Gobierno tambe pa nan tin un bista completo.

Gobierno tin ideanan unda por laga hendenan cu haci 60 aña traha un tiki mas largo. No ta tur doño di trabao ta gusta esaki pasobra mayoria bes ora un hende haci 60 aña e doñonan kier pa e trahador bai. Den entrevista cu ing Edwin Jacobs el a splica cu aki tambe tin strategianan internacional cu tin di haber cu mercado laboral. Ora un doño di trabao bira conciente cu e reto ta nos tur y nos tur mester duna un man, nan lo crea mas oportunidad pa e grupo aki cu hopi biaha kier sigui duna nan aporte na e mercado laboral.